

Collavuraziun pella prosma generaziun

La Regiun Engiadina Bassa/Val Müstair ha inizià ün proget participativ per elavurar üna politica favuraivla per uffants, persunas giuvnas e famiglias. Al principi dal proget stan maisas raduondas – quasi lavuroris – in tuot ils cumüns. In quellas vegnan eruits insembel ils problems, però eir pussibilitats d'augmentar l'attractività da la regiun.

«Nus vain quista saira il dret da pudair far chastels aint l'ajer.» Uschea ha Fadri Häfner, commember da la suprananza cumünala da Scuol, bivgnantà a quellas e quels chi han chattà la via in sala cumünala. Id es üna maisa raduonda a Scuol cul böt d'eruir che visius chi dà pella regiun e pel cumün, che problems e che ideas concretas. La dumonda centrala da quista saira, ma eir dal proget: Che pudessan la regiun Engiadina/Val Müstair e seis cumüns spordscher per famiglias, lur uffants e per giuvnas e giuvens chi creschan sü quia o chi tuornan inavò? Co vain la regiun plü attractiva pellas prosmas generaziuns?

Dürant bundant duos uras han ils partecipants e las partecipantas discutà e fat chavazzins, preschantà ideas e fat attent a difficultats e sfidas. «I nu sun gnüdas giavüschadas robas straminablas o utopicas quista saira, i sun gnüdas proponüdas ideas realisablas», resümescha Fadri Häfner. «Ils puncts principals da quista saira sun: I mancan locals per uffants e giuvenils ed i dà ün problem cul transport per manar als uffants ad occurrenzas d'urant il temp liber aint illas differentas fracziuns ed eir la not cur chi's vuol tuornar a chasa davò sortida.»

Collavuraziun participativa

«Nus vain gnü discussiuns intensivias. Ed in quellas s'haja badà cha tuottas e tuots vezzan il bsögn chi's müda alch e cha nus tuots vain suvent similas ideas», disch la doctressa d'uffants Angela Chappatte. Karin Herger, mamma d'üna matta da ses mais, agiundscha: «A mai para bun ed important chi's guarda insembel che sportas chi dà e che chi manca. E forsa eir ingio chi's po s'ingaschar s'vess per chi's müda alch.»



Var 20 persunas s'han partecipadas in marcurdi saira a la maisa raduonda a Scuol.

fotografia: Michael Steiner

Ils resultats da las discussiuns sun gnüts resümat sün ün placat cun da tuotta sorts cedlas – ideas concretas sper da quellas magari abstractas: Daplü pussibilitats da partecipaziun politica per persunas giuvnas, daplü ingaschamaint dals abitants, spazi d'abitare pajabel, üna sporta da chüra d'urant las vacanzas da scoula, ün kino o eir ün parc da skateboard e bier oter plü.

Organisà ha la maisa raduonda Sabrina Gunsch da la Regiun Engiadina Bassa/Val Müstair. «Il plü important es intant cha nus imprendain a cugnuscher ils bsögns da las abitantas e dals abitants. Perquai invidaina in tuot ils cumüns a quistas maisas raduondas», disch ella. D'involvar e laschar participar a la populaziun illa lavur – quai es ün dals elements centrals da quist proget. «Quist

möd da lavurar es ün tschögn vers il futur», disch Fadri Häfner. «Uschea s'haja eir daplü sustegn illa populaziun. Eu crai cha quai saja la dretta via.»

Discussiun sainza pertocs

Il manco da la saira a Scuol: üna gronda part dals pertocs nu d'eira preschainta, ingüens uffants e be üna rapreschainta da la giuventüna. Lur perspectiva, lur giavüschs ed ideas vuol Sabrina Gunsch resguardar otramain: «Sco prossem pass sun previsas intervistas cun giuvenils tanter 18 e 25 ons in tuot ils cumüns. L'on chi vain faina lura eir visitas in scoulas ed organisain lavuroris participativs cullas scolaras e culs scolar.» E pür lura vain formulà il concept. «Las maisas raduondas, las intervistas ed ils lavura-

toris in scoula sun ils quadrels our da quels ch'eu construisch lura il concept. Ün concept chi cuntogna masüras e böts pella regiun e pels cumüns», declera Sabrina Gunsch.

Chi saja però amo massa bod per dir che masüras e böts cha quai pudessan lura esser, disch Sabrina Gunsch. Uschea nun esa neir na cler scha'l concept resguardarà eir ils giavüschs cha Anina Sieber ha formulà. La duonna da 19 ons s'ha partecipada in nom da la giuventüna da Scuol a la maisa raduonda. Ella disch: «I dà massa pacas localitats per mia generaziun.» Il plü urgiaint tenor ella: «Üna nova disco.»

Michael Steiner/fmr

Maisas raduondas sco a Scuol sun previsas eir amo a Zernez (22 october), a Valsot (28 october) ed in Val Müstair (9 november).

Dumandà davo

«Ingün nu spetta sün ün tigher da palperi»

Fin la primavaira 2026 d'urant las lavurs vi dal concept per üna politica d'uffants e giuvenils. La FMR ha discurre culla responsabla da la Regiun Engiadina Bassa/Val Müstair chi'd es la manadra strategica da quist proget.

FMR: Martina Schlapbach, perche esa gnü decis da svilupper ün concept per üna politica d'uffants e giuvenils?

Martina Schlapbach: Dürant la lavur d'actualisar la strategia «Agenda 2030» da la Regiun Engiadina Bassa/Val Müstair vain nus constatà cha quai es ün tema pro quel chi dà üna necessità d'agir. Tuot ils cumüns vezzan cha la politica dad uffants e giuvenils es importanta e chi fa sen da collavurar in quella dumonda. La conferenza dals presidents ha lura decis da realisar quist concept – eir cun sustegn finanziel da l'Uffizi da sandà Grischun.

Co es il proceder per realisar il concept?

In üna prüma etappa vain fat l'analisi: Che funcziuna, che sun ils problems, che sun ils giavüschs e che esa da svilupper inavò? Quai düra fin prosma primavaira. Sün basa da quella analisa vain lura elavurà fin primavaira 2026 il concept chi propuona masüras e böts sün nivel regional, ma eir sün nivel cumünal.

As poja fingià dir ingio chi dà dal sgür necessità d'agir?

Per nus es la partecipaziun fich importanta – da tuot las gruppas pertocas: genituors, pedagogas, chüraders e naturalmaing eir ils uffants e giuvenils s'vess. Perquai laschain nus in quista fase consciantamaing avert che chi sun las grondas sfidas. Nus sperain apunta güst da tschüffer respostas a quista dumonda pro las maisas raduondas chi han lö in mincha cumün.

Il privel latent pro concepts es cha quels svanischan in alch chaschuet e croudan in invlidanza. Co vöglian Els evitar quai?

L'idea es cha'l concept s'orientescha ferm a la pratica. Ingün nu spetta sün ün oter tigher da palperi. Ma listess as douvra üna basa per trar decisions e realisar progets. Per nus esa important chi detta la pussibilità da realisar pitschens progets eir fingià d'urant il process. Schi's constatescha d'urant il process chi's pudess fingià far alch, lura faina quai. Intervista: Michael Steiner/fmr

Ün condensat jauer sün 65 paginas

Il cudesch «Allegra! Inscunters illa Biosfera Val Müstair» purtretescha a 30 persunas in stret connex culla Val Müstair: indigenas e novrivadas, giuvnas e veglias, manualas ed artisticas. Quista fin d'eivna es il cudesch gnü preschantà a Valchava.

«Tenor meis avis, dvaintast tü ün pa sco il lö, ingio cha tü creschast sü.» Quai disch Dario Fallet da Müstair. E scha quai tuorna, lura es il cudesch «Allegra! Inscunters illa Biosfera Val Müstair» in alch möd eir ün'instrucziun per inleger als Jauers e las Jauras e lur val.

La vendadra Teresa Gruber, chi ha passantà tuot sia vita in Val Müstair e d'eira ons a l'inlunga, ses dis l'eivna, fingià a las set a bunura in butia, disch be listess: «Eir schi daiva blera lavur,

nu vaiva ingün stress. Quai nu cugnuscha.» La manadra dal Camping Müstair, Isoldè Christandl, oriunda da Tuer, güst da tschella vart dal cunfin, disch: «Eu sun üna Jaura, be sül palperi amo nöglia.» Il falegnam Armon Feuerstein da Fuldera chi ha sajettà ün uors be cul balaister in Canada disch: «Nossa val es uschè bella ch'eu nu less plü ir davent.» O lura la biologa Gabi Müller da Turich chi ha chattà la via in Val Müstair d'urant l'epidemia da corona, perquai cha las vacanzas illas Filipinas nu d'eiran plü pussiblas: «Quai es stat üna furtüna!»

Collavuraziun tanter generaziuns

«Nus vain fat atenziun da purtretar a persunas our da tuot ils cumüns, giuvnas e veglias, indigenas e seguondindigenas, homens e duonnas», disch l'autura Susann Bosshard-Kälin chi viva ad Egg i'l chantun Sviz. Ella s'vess ha impris a cugnuscher la Val Müstair d'urant ün stipendi da litteratura l'on 2022 e laiva fingià quella jada scriver sur dals Jauers. Il prüm ha però stuvü

ira a fin l'epidemia da corona per tour per mans l'idea.

Concretisà l'idea s'haja lura in collavuraziun cun Franziska Peter, respunsabla per educaziun e cultura pro la «Biosfera Val Müstair». Susann Bosshard-Kälin declera: «Important ans d'eira chi'd es üna collavuraziun da duos generaziuns e ch'inchün indigen am cumplettesch.» E sün ün inserat aint il mas-chalch, il fögl uffizial dal cumün, s'ha lura annunzchada Anna Rodigari da Müstair. Sper l'autura rutinada da 70 ons ha la gimnasiasta fat sias prümas experiencias schurnalisticas.

«Eu n'ha il prüm pudü guardar co cha Susann fa quai e lura surtut ün pa seis möd da lavurar: Far las intervistas, transcriber tuot e lura fuormar ils texts landroua», quinta Anna Rodigari. Ella ha scrit 13 dals purtrets in rumantsch, seis texts preschaintan als indigenas. Susann Bosshard-Kälin ha scrit tschels 17 purtrets in tudaisch, seis texts preschaintan a persunas novrivadas o chi han lur seguonda patria in Val Müstair.

L'uman in seis lö predilet

Il cudesch nu preschainta a las persunas be in plets, ma eir cun ün purtret. Las fotografias ha fat Ivan Tschennett da Müstair. Pel solit fotografescha el bes-chas o cuntradas. «Pro las bes-chas spettast sül dret mumaint, quia stoust dar instrucziuns. Quai nun es vairamaing meis möd. Eu n'ha lura adüna dit «prouva da t'impissar ch'eu nu saja quia». Scha quai ha funcziunà sun tenor mai gratiadas las megltras fotografias.»

In üerts, gods e sü vers ils pizs ha Ivan Tschennett accompagnà a seis protagonisti: «Quia giaiva per quai da muossar l'uman in seis lö predilet. La cuntrada giova üna gronda rolla – tuot la situaziun sto esser consistenta.» Pro la vernissascha a Valchava resümescha Anna Rodigari: «Eu sun gnüda a cugnuscher propa bain la glieud cun quella ch'eu n'ha fat las intervistas. Lur istorgias, che chi fan, co chi vivan. Tuots han fich gugent la Val Müstair.» E la co-autura Susann Bosshard-Kälin agiundscha: «Il cudesch preschainta ad umans

chi preschan la Val Müstair. E chi nu sun indifferents vers il futur da la val.»

Natüra, quietezza e pissers

«La natüra da la Val Müstair e la quietezza fan bain», disch la magistra da yoga Marjoleine Pitsch bod rapreschaintativ per tuot la glieud purtretada. Il fil cotschen da tuot ils raquints es propa l'admiraziun per la natüra. Adüna darcheu as muossan però eir pissers, dubis pervi da las perspectivas tuorblas da la generaziun giova. «Nus vain da mantegner la Val Müstair, ma nun ans dostar cunter il müdamaint», disch per exaimpel la pensiunaria Verena Meier. E la tessunza e pastizera Giuanna Hohenegger agiundscha: «Per ün futur in quista cumünanza esa important cha las ideas dals giuvens vegnan acceptadas daplü.» Üna da quellas giuvnas, l'autura Anna Rodigari, tira lura però be listess ün facit positiv: «Eu crai cha quai chi fa oura ils Jauers saja la colliaziun culla natüra. Scha tü vivast quia, s'ast: Id es vairamaing schon ün paradis.»

Michael Steiner/fmr